

續金華叢書



續金華叢書



少室山房類藁卷百十五

續金華叢書

漱水胡應麟明瑞著

書牘十五首

與大學士趙公論東西二虜書

長君至自燕中甫解裝則大教發焉盟誦載三洽然金石之音從天而墜而二錄綢繆互映又恍然由石渠之秘而披芸閣之編也以相公執事端居廟堂密勿之中萬方待命而不遺草莽軫念衡茅至于斯極卽古上臣休休吐握一饋而七十起者奚殊哉伏惟執事躬聖賢之學負豪傑之才自蜚聲玉堂正氣直節已岳岳動海內茲起昌辰握鼎鉉調元化運斗樞登庸以來三光順序百神受職黃童白叟霑旤雨霖此大人正已物正感格帝衷之明驗也頃窮邊小醜戕賊主帥負固重城奮螳臂以觸天朝而日本兇渠陸梁島嶼襲奪我藩邦狙伺我甸服東西二方亦孔亟矣執事聲色不動簡命元戎授以方略不逾旬月叛黨肅清父子纍纍組繫闕下一時伏鎖迺比者又

聞平壤大寇羣倭鼠奔封豕長蛇旦夕殄戮卽公旦往征山甫薄伐
僅此繼見裴中令之平淮范參知之懾夏皆下風矣不佞以通家世
誼竊覩末光陰受太平之賜慶幸曷勝自惟迂謬狂疎生彌寸樹惟
是估俾呻吟羸二十載于古鏡歌古吹等曲竊覩一斑將追倣韓愈
氏作爲詩詞以鋪張武功揚詡聖德且俾天下後世采錄民風參稽
野乘者備知執事垂紳正笏措天下于太山若此雖然芹曝之衷竊
有獻于左右夫統萬之平也固繇社稷之效靈廟堂之定策與夫邊
將之戮力逆黨之天亡亦以西郵諸敵玩弄我掌上出入我彀中無
復英雄之度故也今大眾解嚴人心懈弛反側得亡有未安平瘡痍
得無有未復乎萬一餘黨尙存規圖前事勾引羣敵中之善戰者乘
我無備出我不意夤緣復入互爲聲援海內英雄藉之而起其憂更
有大于曩日此不可不爲蚤計也夫平壤之尅也功則偉矣顧巨寇
方張詭變叵測懸軍絕塞主客勢殊樵采易撓飛輓難繼情見勢屈
何以自拔昔魏太武禽赫連昌于統萬旋卽罷歸定以殘孽招合燼

餘更據邊陲幾爲勅敵竭國之力而取之唐文皇以古今善將將天下精兵頓安市堅城之下竟不能一抵平壤亡功而還至宇文述滌水之事足爲永戒雖繼絕存亡除兇伐叛堂堂天朝王者之師非前代驕卒貪帥兵出無名者比而二方故轍昭灼簡書草茅書生良不能無漆室之憂杞人之戚執事方博詢寓內石畫以興太平豈遂以不肖爲狂爲迂也竊以當今之策西事已寧者宜速諭指邊臣一切澡濯其前非而更張其敝轍行寬大之政養和平之福開生息之源柔詿誤之徒收桀黠之效而明斥埃于外詰戎兵于內俾士懷其安民忘其敗庶瘡痍漸復反側自安十年之後葆大藩滋更爲雄鎮雖有狂虜自足以懾窺伺之心至救朝鮮之事示以便宜戒之深入毋貪功毋玩敵毋養寇而俾我大兵之戍遼左者多爲之形援四張其聲勢務令吾一身血脈呼吸關通卽有緩急辰發已應使朝鮮之君循行境上招徠其攜貳傾誘其散亡彼腹臣心膂貴戚遺氓聞故主尙存而天朝爲之規復將揭竿斬木以剽仇讐簞食壺漿以逆戎陳

然後出吾兵之據平壤者椿其心發吾之戍遼左者擣其腹彼欲去弗能欲戰弗角欲欲守弗固不半載而勅敵之馘懸于臺街可也吾誠若是則振古之功成善後之策備執事所爲上報主知下厭眾望者烜赫炳耀竹帛旂常高揭大書詎惟我百里光卽垂諸千禩永永不朽矣以執事之明灼如鑑而不肖一書生謬談天下大計至此可爲捧腹然古今載籍事有類此無慮數端則皆歷覩其利病而不敢以無實之空言進也惟執事者熟籌而審計焉倘萬一以爲可采則國家幸甚桑梓幸甚

報少宰趙公

踰瞻垣斗載歷歲時屬賤疾膏肓卽長于嚴瀨一水盈盈莫能鼓枻而東以庶幾旬日之誨迺尊者之賜儼然辱先臨之盛藻華絨煥逾九鼎感私謝臆殆將奉以終身竊惟執事剛方之氣峯崒萬仞鴻偉之度周暨八埏寓內蒼生若近若遠拭目繫心久矣茲留都暫借天假晝遊旦夕徵拜大廷舟楫函夏身係中國安危昇宇宙東南千古

生色詎惟嫫人一方私祝私慶而已承弇州晨暮聚首文殊摩詰二
大士互說妙詮將遂令大地山河六種震動若何令須菩提舍利弗
輩與聞之首夏清和南中多暇雨花牛首高座諸勝日嵯峨尊俎間
倡和篇章動盈卷軸願一一致歸勒飛雲片石之傍爲異時靈洞山
房增一卧遊公案也

奉大司空朱公

鄭商行蕭狀起居尋挾書北上日踐踐牛馬走中首夏南還晤長公
知福履方來不任私慶翁累朝宿德一代元老雖逍遙綠莖怡神太
虛而鴻烈駿猷屹然與匡廬南斗參峙大江昔人所稱身係中國安
危殆非虛語應麟忝收國士亦越十年碌碌塵埃亡一善狀屬者稍
欲以雕蟲自見而幽憂疾疢日尋湯藥文園病軀青蓮傲骨長康愁
態孟郊窮愁兼茲四子合爲一身無昔人之寸長有古者之眾疾當
今棄物自揣其尤落羽遄歸勞苦徹骨叨竊洪庇遂煖桑榆圖書萬
軸金石千卷蝸涎鼠壤差用自娛且遁迹廣川長谷遂其幽深間以

少室山房卷之十五
三
畊釣之餘成一家之業庶幾上酬教毓盛心生成大德而二親在堂
旁無庶弟下寡弱息顧戀徘徊未便長往惟我師相始終造之家君
比歸自滇父子晨昏頂戴高厚非言所旣明府使西附致犬馬新霜
乍寒珍攝道躬爲宗社爲生靈自愛不宣

奉滕中丞先生

春暮蘭陰一瞻道範屬樓船迅發悵惆迨今師碩望駿猷昭揭寰宇
宏才絕學振起東南茲偶以萋菲莠言飄然岩穴青鞋布襪徜徉幔
亭九曲間卽考亭無能擅燉前代何論東山謝公第海內蒼生喁喁
旦夕恐神龍威鳳終須一出以副霖澤羽儀之望非岩穴能久佇也
應麟於於越諸生最辱空羣之顧迄今幽憂枕席尺寸無聞追惟曩
昔國士殊恩慚汗浹背廼嬰疾以來烟霞泉石愈結膏肓究竟未知
面目何似或藉師靈寵得少以著述自係千秋庶不負教育生成億
萬分一耳春深藥餌稍讐將負笈春糧介武夷君伏謁函几于三十
六峰之下櫂歌漁唱昕夕周旋知龍門之不見拒也

興王世叔通侯

曠觀風儀載歷歲矣伏惟節旄金印坐鎮長淮芻粟如山鯨鯢屏息
社稷重臣當代無兩而偏工餘事漁獵詩騷又且騁曹劉而軼韋孟
豈昔人所謂天授非人力者耶何全智獨稟也至虛懷樂道忘分下
賢若禹周之據饋吐哺則原嘗四子不足齒牙矣不肖猥以庸樗謬
蒙采拾中懷耿耿每遇西風何嘗不振袂長吟冀追逐三千珠履晤
對笑言于清油幕下至夜雪谿頭輒思浮輕舸入剡曲一問安道故
居惟是病廢以來班白在堂孩提在抱加之賤荆淪喪半壑之外步
武惟艱所冀明公亮其疎節不以人間世禮法督過之幸之幸也說
仲使旋附訊起居主臣無任

又

辱諭皇明詩統舊輯古近體僅六十卷藁垂脫而奔走江湖以卷帙
浩繁局置子舍第五七言律自隨易惟效使君偶覩稍命增入弘正
前名下諸公什之四三凡耳目所及槩不敢錄慮或漏遺故也蜀中

業已梓行君侯下問惓切謹仍錄首卷以上惟俯爲藏拙焉

報郭舜舉觀察

曩客武林一奉末光于湖上卽單辭片諾而古心古誼令人如醉醇
醪尋復晤對郎君喬梓風華交映睂睫羈懷旅况淘遣一空新秋拜
命華緘副以鉅刻于時披誦踴躍擬趣叩行館以罄宿衷則文駕前
發關外念之悵然使來重辱八行恍晤顏色丘山之惠旣感且慚胡
長者昌歎鄙人至于斯極也不佞樗櫟散材志無廊廟謬知當路跬
步覲顏頃復自放丘園奄冉廿載而數膺家難載涉風塵茲馬齒日
衰倦游彌劇加以高堂八旬弱息三稷病荆牀蓐瘦骨伶俜而欲以
青裙白髮塗抹于五陵年少之前寧不滋其捧腹也長者垂神委篤
漫爾及之二詩少致仰懷并希鐫削蘇堤岳墓花事漸饒軒車至止
更圖握手以悉原言

再報舜舉

明公一代人倫千秋匠哲頃嘉隆諸老相繼喪頽詞場尊宿指無多

屈靈光一柱行且頽頽大椿以覆庇海內寒士胡來諭之謙謙也名
篇華什麗爾清新大曆黃初縱橫信手揭之座右日奉周旋附復不
既

與楊使君

憶二三君子結社都門時也執事實以大雅主盟其間而不肖之獲
從諸君子後則執事以通家子進之朝夕坐隅楊榷古今摘剔瑕謬
執事所爲功德不肖甚盛也俄執事有滇中之命二三同志次第星
散不肖亦以隨侍還越每追念舊遊側身南望萬里之外神爽欲飛
方日夜以淮陽之召爲執事祝廼聞執事竟拂衣歸矣潏雖孔道不
肖故多病謝客無從通尺素以候起居曩者稚修來邑私竊自幸可
緣是一奉大教俄而此兄物化竟爾中輟媿之媿之邦相丈至詢知
道履萬福裕卿繼來稱述近况竹林風致宛然猶昨江右山川比之
京洛故自不減第曩時坐中小阮竟屬何人含杯之暇故未能無念
不肖耶執事偉望碩才上之當握管大廷黼黻皇度下之亦當秉鐸

一方鎔鑄羣品廼以盛年屏迹田里豈造物者忌才抑固將用是成
執事千古也執事無苦丘明氏所稱不朽豈獨區區功名際哉後世
知楊子雲固百倍于當時知者奚以解嘲爲也小詩一章聊當奉憶
并屬邦相使致之

報大司寇李公字安

於越鄙人跼伏草茅於當代鉅公鮮所知識顧自髫髻往來京洛間
則伏聞執事高風冀一摳衣門下蓋匡廬南斗之仰十禩于茲矣頃
者邦相明府以舊知來邑朝夕聚首揚扃藝文每屈指當今匠哲輒
推轂明公不啻口出因間請大集閱之恍然若入清廟明堂觸目皆
天球彝鼎誠希世之偉觀而藝林之奇構也于時附驥之思寸衷飛
動妄冀一廁名簡末自係千秋而邦相遽以校讐見委且盛稱執事
廣心偉度靡擇芻蕘遂輒因明府之言濫加次第自顧菲才陋識管
窺一二無異醯雞旦夕兢兢獲譽大君子是思廼重辱使者遠將筆
札副以腆儀慰誨勤倦賜予逾越感恩沐德鏤蝕肺肝伏承嚴諭盛

欲以俚語弁之卷端尤非眇薄所敢聞命夫文逾左氏而徵序士安賦越隱侯而邀賞元禮執事固搗謙亡已廼賤子之弗量其何假以自文涼秋具草印正大方或仰藉寵靈獲以塗抹之餘玷名山之籍豈直惟萬鍾五鼎榮莫並之不腆脞詞且日月偕永矣來鴻促發草勒謝悰緯羅一襲絲布一端附使者西以竊比于越裳之貢

報陳京兆玉叔

陸司成攜大集至鹽沐誦之如清廟朱絃華堂白紵冲夷粹雅三嘆而有餘音文則周鼎商彝隋珠卞璧古色黯然精理瑩然亡絲微可瑕摘也古所稱和順積中英華發外有德者必有言亮哉乎不誣矣尺牘纒纒數百言靡非肝腹至詩數筆叢二序快哉公以千秋惠我也公名篇鉅製流布遐邇雞林之徼捐金購募或終歲不能得片言鄙人顧未及請而兩得之公之溺愛鄙人廼至于斯極而鄙人之庇藉寵靈懸諸日月不將與二序無窮耶天尺樓詩草綴上二酉園遂得五言古一章弁心遠堂萬緣軒冢君所命皆成之一日者不佞之

索居而離羣也久矣惟大匠斧削焉

與玉叔

僕嘗謂公雅量足以鎮一世高誼足以驅千秋廣心足以容萬夫虛懷足以傾四海無論當代賢豪聲氣輻輳卽韋布山林晚進未學片長寸善葑菲不遺達公之志匹夫匹婦有弗與被吐握之澤者且引爲已辜焉雖謂公藝苑中伊周可矣洎公之晉而留都海內同聲莫不舉手加額冀公立躋三事高峙岩廊爲文章吐氣而寒素之流尤汲汲焉所望于大厦之庇可知也邇公則竟以留都歸也豈道大莫容自昔固然耶將公取精造物者眾而不能毋小阨于位耶將造物者故小阨公之位行且大昌公之樹以永賴于千秋耶維是謝公不起蒼生之望惡能釋然逮今雙鬢未蒼二屐猶健優游東山花月間小適歲時一旦蒲輪入楚終當出建掃除天下之業而以其緒餘雨澤東南半壁俾人人以太丘庇我庶明公素志爲允愜而當代瞻仰爲不孤哉夫雨花靈谷之勝不佞往來方寸十載矣計且因公一縱

其游目方東裝而驟聞公之促駕歸也夫安能無望于公之復出也
與吳大參座師

急足過蘭辱師俯念門牆將致大惠感戀之深淪浹心髓亟欲叩謝
薇垣屬家慈宿疾未平每歲之中暑候尤劇坐是未克裹糧東下罪
狀何言師名世偉才藩參之擢越在疆場寧足爲人借寇公地然臨
安一郡遺愛萬家茲者建高牙擁大纛坐嘯其間湖山列庭雲霞屬
路徵輸之暇時一巡行使錢塘士民嘖嘖稱羨此前使君吳公也豈
不亦快心壯遊哉雁蕩烟嵐六橋花柳數歲之中兼撮其勝師殆玉
皇香案吏躔謫塵寰非復世人也嘯歌成帙愿發郵筒涼風伊邇倘
許以青鞋布襪唐突于旌當買孤槎犯雪浪奉候于龕赭二峯之側
江湖千丈絕勝廣陵門下生老矣猶能從師賦焉

報羅觀察

俞生至自豫章首出華緘副之麗筆蠅頭蠶繭清風穆如公海禹達
尊震旦老宿俯視不佞辟諸一蚤一蚊勞于何有迺不棄芻蕘先施

草莽多方汲引慰誨拳拳卽有宵無心寧不寤寐奮飛冀執鞭弭于
門牆之末惟是小子狂簡不知所以裁之政恐太上之途非凡質鈍
根單刀可入耳鴻歸草勒陳謝新秋涼適擔簦躡屨候公廬岳之巔
雲屏九疊瀑布萬尋勝概大觀惟長者指示以洞開茅塞幸毋日游
夏弗能贊一詞也

報劉君東

頃歲偕吾丈握手清源碣石間一別便如夢寐迄今十載餘矣接大
教廼知丈已高尚不赴公車者久矣僕邇歲以賤荆淪逝株守一丘
無復計偕之念意丈飛騰雲漢搏扶搖而上九萬不謂亦同此懷也
人世浮榮電光石火區區蝸角雞肋何足論哉職方公集夙所嚮慕
而往時收錄僅得數卷今大編勒成殊快仰止之私怡園佳勝種種
暇當如命作一記奉贈不敢負諾也令壻英英玉潤足爲後進中領
袖而忻慕不朽之業尤爲難事亦吾丈翁壻之間意氣所注致足欽
也詩藪一部中間持論頗爲藝林所許其國朝一帙首論國初諸公

便以職方公爲領袖其時談藝之士未暇及尋也今俱爲友人攜去
僅一部留杭者存而紙素漶滅以兄所必欲見者輒附請教幸笑存
之伏枕口古一津聊致鄙懷外新刻一部詩扇二握方墨四函奉上
病瘍不見賓客者兩月餘以公手札勉起與令壻相接粗糲恩恩不
能留爲平原之飲異時丈或乘興完溪上之盟當傾倒十日以竟此
懷耳十指憤憤不復能作蠅頭書亦計丈高雅不復以世法相束縛
耳鴻迫萬不一申旣惟炤亮